



CONCELLO DE CABANAS (A CORUÑA)

ACTA DA SESIÓN ORDINARIA DO PLENO DA CORPORACIÓN, REALIZADA O 25 DE SETEMBRO DE 2019

Alcalde-Presidente:

D. Carlos Ladra Brage

Concelleiros/as;

Dª. Concepción Rodríguez Ferreiro (Gr. Socialista)

Dª. Diana Mª. Rodríguez Fernández (Gr. Socialista)

D. Iago Varela Martínez (Gr. BNG)

Dª. Paula González Grueiro (Gr. BNG)

Dª. María Eva García Amor (AEC-Gr. Mixto)

D. Manuel González López (Gr. Popular)

D. Javier Fernández Brage (Gr. Popular)

Dª. Mª. José Bouza Varela (Gr. Popular)

D. Xosé Manuel Pérez Sardiña (En Marea-Gr. Mixto).

Secretaria-Interventora accidental:

Dª. Susana Fernández Muñoz

No salón de sesións da Casa do Concello de Cabanas, sendo as dezaseis horas e trinta minutos, do 25 de setembro de douce mil dezaseis, reúnense en primeira convocatoria, baixo a presidencia do Sr. Alcalde, Carlos Ladra Brage, os señores/as concelleiros/as que se relacionan á marxe, ao obxecto de realizar sesión extraordinaria do Pleno da Corporación, coa asistencia da Secretaria-Interventora accidental, dona Susana Fernández Muñoz, que da fe do acto.

Unha vez comprobada a existencia de quórum para a válida constitución do Pleno, o Sr. Presidente declara

aberta e pública a sesión, e procédese a tratar os asuntos incluídos na Orde do Día.

1. Aprobación, se procede, das actas de sesións anteriores.

O Sr. Alcalde dá a palabra a Secretaria-Interventora accidental que expón que o primeiro punto da orde do día trata da aprobación, se procede, das actas correspondentes ao Pleno extraordinario da Corporación, de data 29 de xuño de 2019, e Pleno extraordinario da Corporación, celebrado en data 30 de agosto de 2019, que foron remitidas na documentación da convocatoria do presente Pleno.

O Sr. Alcalde, Ladra Brage, pregunta se alguén ten algo que engadir, non habendo intervencións ao respecto.

A continuación a Presidencia somete a votación a aprobación das actas das sesións extraordinarias do Pleno, de datas 29 de xuño de 2019 e 30 de agosto de 2019, resultando 11 votos a favor dos representantes Grupo Popular, Grupo Socialista, Grupo BNG e Grupo Mixto, sendo aprobadas ditas actas por unanimidade.

2. Festivos locais anualidade 2020.

O Sr. Alcalde dá a palabra a Secretaria-Interventora accidental que expón que o segundo punto da orde do día trata de un oficio remitido pola Xefatura Territorial da Coruña da Consellería de Economía, Emprego e Industria, en relación ao calendario laboral para a anualidade 2020, no que solicita a elección polo Pleno da Corporación dos festivos locais do



CONCELLO DE CABANAS (A CORUÑA)

Concello de Cabanas para a anualidade 2020. Dito asunto foi ditaminado na Comisión Informativa de Asuntos do Pleno de data 13 de setembro de 2019.

O Sr. Alcalde, Ladra Brage, expón que os festivos que se propoñen para a anualidade 2020 e que se trataron na Comisión Informativa de Asuntos do Pleno son o día 25 de febreiro, Martes de Entroido, e o 30 de novembro, Santo André, abrindo, a continuación unha primeira quenda de intervencións.

Non existindo intervención algúns ao respecto, a Presidencia somete a votación como festivos locais para a anualidade 2020 o día 25 de febreiro, Martes de Entroido e o 30 de novembro, Santo André, resultando dez votos a favor dos representantes do Grupo Popular, Grupo Socialista, Grupo BNG e concelleira de AEC (Grupo Mixto), e unha abstención do concelleiro de EM (Grupo Mixto), quedando aprobados como festivos locais do Concello de Cabanas para a anualidade 2020 o día 25 de febreiro, Martes de Entroido e o 30 de novembro, Santo André.

3. Modificación PXOM e ampliación e mellora dos espazos no Centro de Saúde de Cardeita e no Colexio Eladia Mariño. Proposta concelleiro EM (Grupo Mixto).

O Sr. Alcalde dá a palabra a Secretaria-Interventora accidental que expón que o terceiro punto da orde do día trata proposta do concelleiro de EM (Grupo Mixto), Sr. Pérez Sardiña, en relación á modificación do PXOM e ampliación e mellora dos espazos no Centro de Saúde de Cardeita e no Colexio Eladia Mariño, na que se inclúen once puntos. Dito asunto foi ditaminado na Comisión Informativa de Asuntos do Pleno, de data 13 de setembro de 2019.

O Sr. Alcalde, Ladra Brage, dá a palabra ao concelleiro de EM (Grupo Mixto), Sr. Pérez Sardiña.

O concelleiro de EM (Grupo Mixto), Sr. Pérez Sardiña, expón que esta proposta foi no mes de xullo e non foi tramitada para o pleno anterior, que tiña que ser obligatorio, por lei, no mes de xullo, procedendo á continuación á lectura da proposta:

'Exposición de motivos'

Considerando as observacións achegadas no escrito da Xunta de Galicia sobre tramitación do Plan Xeral de Ordenación Municipal, de marzo de 2019, sobre deficiencias a corrixir no expediente.

Considerando a situación e tramitación do PXOM pasaron 9 meses, dende a aprobación provisional sen que se informe á Corporación.

Considerando as propostas realizadas na pasada lexislatura

Por todo isto, a Corporación municipal ACORDA

'Modifícar o Plan Xeral de Ordenación Municipal aprobado provisionalmente en outubro de 2018, antes de que a Xunta de Galicia o aprobe definitivamente e corrixir as seguintes deficiencias:

1.- Incluir a ampliación do Centro de Saúde de Cardeita e mais do CEIP Eladia Mariño.

2.- Comprobar se hai cambios substanciais ou accesorios entre a aprobación inicial e a aprobación provisional tal e como advirten o informe de secretaría e o informe do arquitecto municipal de outubro de 2018.



CONCELLO DE CABANAS (A CORUÑA)

3.- Suprimir a ampliación do SUD-1 na súa esquina superior noroeste (Cardeita) sobre predios excluídos do ámbito urbanizable na Aprobación inicial de 2014, ao non estar motivado nin en alegacións nin en informes sectoriais.

4.- Harmonizar a cualificación do solo ao longo da N-651 en concordancia ás Normas Subsidiarias Municipais e ás alegacións presentadas nese sentido.

5.- Harmonizar a parcela mínima establecida para os núcleos rurais coas Normas Subsidiarias Municipais, Plan Básico Autonómico e con múltiples alegacións nese sentido.

6.- Corrixir a asignación do Solo rústico de protección de augas e zonas inundables co Plan Básico Autonómico e alegacións nese sentido.

7.- Xustificar o plan económico de viabilidade en concordancia co exixido pola Xunta de Galicia e co informe de secretaría de outubro de 2018.

8.- Aplicar a toponimia oficial do Plan Básico Autonómico.

9.- Suprimir definitivamente o convenio PEORM-1 relativo ao Pombal e identificado erroneamente co topónimo das Modias, Porto, en concordancia con alegacións nese sentido.

10.- Prohibir a autorización de construcións no piñeiral da Madalena en concordancia coa protección total das Normas Subsidiarias de Planeamento de Cabanas e coas características ambientais da duna gris protexida polas Directivas europeas e potencial lugar de aniñamento da píllara das dunas.

11.- Establecer, á maior brevidade despois de aplicar estas modificacións, un segundo período de exposición pública do Plan Xeral de Ordenación Municipal.

Cabanas, 23 de xullo de 2019.”

O Sr. Alcalde, Ladra Brage, abre unha primeira quenda de intervencións.

Na deliberación do asunto prodúcense as intervencións coas opinións que se recollen a continuación:

A voceira do Grupo Popular, Sra. Arias Martínez, manifesta que desde o Grupo Popular, como xa se dixo na Comisión Informativa de Asuntos do Pleno, estamos evidentemente a favor de que este PXOM saia adiante, sempre o estiveron, dende o principio, pero están tamén a favor de esperar a que veña calquera cambio ou modificación que sexa necesario por parte da Xunta de Galicia; manifesta que non están a favor de modificar nada ata que a postura da Xunta de Galicia estea o suficientemente clara.

Subscribe que lle gustaría moito que o goberno local explicara a súa postura con respecto ao PXOM, porque temos entendido que sempre lles pareceu mal, que nunca estiveron a favor e, sen embargo, na Comisión Informativa de Asuntos do Pleno atopámonos cun cambio de postura. Gustaríalle saber, xa que os votantes e os veciños están bastante confundidos, a que se debe ese cambio de postura con respecto ao PXOM e por outra parte dá a noraboa a Eva, de AEC, por levalos ao bo camiño.

O voceiro do Grupo BNG, Sr. Valela Martínez, manifesta que expoñer publicamente o PXOM por segunda vez para que toda a veciñanza teña coñecemento de como lle afectan as



CONCELLO DE CABANAS (A CORUÑA)

modificacións efectuadas, xa se fixo, está na páxina web; e, en segundo lugar, farán o posible por atender as propostas da veciñanza, incorporar medidas correctoras en todos os ámbitos posibles, buscando outro modelo de desenvolvemento urbano e centrándose no benestar da veciñanza. Estes dous puntos pertenecen ao programa co que nos presentamos, e quería comezar con isto porque estes seguen a ser os principios reidores que guían a miña actuación como concelleiro de urbanismo, e a actuación do goberno municipal en relación co PXOM.

É certo que hai moito tempo que non se fala do PXOM e polo tanto nós somos os primeiros que estamos interesados en falar del:

O 29 de xaneiro de 2014 procedeuse á aprobación inicial o PXOM, abrindo o prazo de alegacións.

O 31 de outubro de 2018, procedeuse á aprobación provisional do PXOM, e con data 1 de marzo de 2019, entra no Rexistro Xeral da Xunta de Galicia.

Neste punto do proceso, se vemos ao artigo 60.14 da Lei do Solo de Galicia, establece que a Consellería, no prazo dun mes, examinará a integridade do proxecto de plan. De apreciarse algunha deficiencia requirirá a súa emenda; ata o cumprimento efectivo do requerimento non comezará o cómputo do prazo legal para a resolución sobre a aprobación definitiva do documento.

A Consellería, en data 29 de marzo de 2019, remite ao Concello de Cabanas un documento no que se require documentación, entre eles catro informes: Informe de Demarcación de Costas do Estado, Informe da Dirección Xeral de Aviación Civil, Informe de Augas de Galicia e Informe de Industria, Enerxía e Turismo, en relación coas telecomunicacións.

Consta a solicitude de ditos informes en data 6 de xuño de 2019; das catro solicitudes tan só foi atendida de momento unha, Informe relativo ao Ministerio de Industria, polo que se está esperando a que cheguen os tres informes restantes solicitados.

A moción presentada polo concelleiro de EM, merece facer as seguintes consideracións, procedendo a comentar cada punto de xeito individualizado:

No punto 1.- Incluír a ampliación do Centro de Saúde de Cardeita e mais do CEIP Eladio Mariño.

Manifesta que é unha cuestión razonable e lóxica.

No punto 2.- Comprobar se hai cambios substanciais ou accesorios entre a aprobación inicial e a aprobación provisional tal e como advirten o informe de secretaría e o informe do arquitecto municipal de outubro de 2018.

O arquitecto municipal redactou ata tres informes en relación cos documentos da aprobación provisional, e nos referidos informes, a diferenza do que se manifesta na moción, non se observan cambios de carácter substancial.

No punto 3.- Suprimir a ampliación do SUD-1 na súa esquina superior noroeste (Cardeita) sobre predios excluídos do ámbito urbanizable na Aprobación inicial de 2014, ao non estar motivado nin en alegacións nin en informes sectoriais.



CONCELLO DE CABANAS (A CORUÑA)

Habería que facer unha análise máis profunda, obxecto de debate moito maior, que non procede neste Pleno.

No punto 4.- Harmonizar a cualificación do solo ao longo da N-651 en concordancia ás Normas Subsidiarias Municipais e ás alegacións presentadas nese sentido.

Manifesta que esta cuestión estima que é razonable.

No punto 5.- Harmonizar a parcela mínima establecida para os núcleos rurais coas Normas Subsidiarias Municipais, Plan Básico Autonómico e con múltiples alegacións nese sentido.

Manifesta que esta cuestión é lóxica.

No punto 6.- Corrixir a asignación do Solo rústico de protección de augas e zonas inundables co Plan Básico Autonómico e alegacións nese sentido.

Manifesta que é algo que é obvio.

No punto 7.- Xustificar o plan económico de viabilidade en concordancia co exixido pola Xunta de Galicia e co informe de secretaría de outubro de 2018.

Manifesta que é obvio tamén.

No punto 8.- Aplicar a toponimia oficial do Plan Básico Autonómico.

Manifesta que é indiscutible.

No punto 9.- Suprimir definitivamente o convenio PEORM-1 relativo ao Pombal e identificado erroneamente co topónimo das Modias, Porto, en concordancia con alegacións nese sentido.

Manifesta que é unha cuestión que debería ser obxecto dun debate máis profundo, non nun Pleno. No relativo á parte toponímica, é obvio.

No punto 10.- Prohibir a autorización de construcións no piñeiral da Madalena en concordancia coa protección total das Normas Subsidiarias de Planeamento de Cabanas e coas características ambientais da duna gris protexida polas Directivas europeas e potencial lugar de aniñamento da píllara das dunas.

Manifesta que resulta axeitado establecer a prohibición de edificar con carácter xeral; como é obvio pode haber necesidades de construir certo tipo de edificacións na zona do piñeiral, como historicamente se fixo, e por tanto tampouco procedería.

No punto 11.- Establecer, á maior brevidade despois de aplicar estas modificacións, un segundo período de exposición pública do Plan Xeral de Ordenación Municipal.

Manifesta que non se dan as circunstancias para facer unha explicación en relación a unha segunda exposición, pero o PXOM está a disposición de todo o mundo na páxina web do Concello.

Como resumo do anterior, manifesta que algúns dos puntos que se comentan na moción son obvios e razonables; outros carecen de fundamento e outros non teñen encaixe; en calquera caso temos que ser conscientes do proceso do PXOM no que estamos e, como puideremos



CONCELLO DE CABANAS (A CORUÑA)

confirmar co servizo de asistencia a municipios da Deputación da Coruña, o que pide esta moción non se pode realizar neste momento do proceso do PXOM; o Concello ten que esperar a que cheguen eses Informes, completar a documentación, remitilos á Xunta de Galicia, e agardar a súa resolución; se imos novamente á Lei do Solo, no seu artigo 60.16, establecese que unha vez completada a documentación, a Xunta, no prazo de tres meses pode responder: aprobar o PXOM definitivamente, aprobar o PXOM con condicións, aprobar parcialmente o PXOM ou rexeitalo; o Concello só pode actuar nos últimos casos, propoñendo os cambios nas áreas rexeitadas ou refacendo o Plan.

O Sr. Alcalde, Ladra Brage, abre unha segunda quenda de intervencións.

O concelleiro de EM (Grupo Mixto), Sr. Pérez Sardiña manifesta que en relación ás opinións vertidas teñen unha serie de consideracións; a Xunta aínda non admitiu a trámite o expediente de aprobación provisional e, por esa circunstancia, ata o cumprimento do requerimento, de 29 de mazo de 2019, non comezaría o cómputo do prazo legal para resolver sobre a aprobación definitiva. Neste sentido, nesa mesma comunicación esíxese ao Concello unha serie de modificacións, e de aí se inicia este debate.

Advírtese ao Concello que non se están integrando no PXOM as condicións primeira e terceira, esta última no senso de establecer a obriga de obter autorización da Dirección Xeral para as actuacións na zona verde, solo urbano da praia da Madalena.

En canto ás consideracións finais da memoria ambiental advírtese que falta por integrar as determinacións 3^a, 5^a e 6^a; manifesta que poñen enriba da mesa este debate sabendo que non ían a estar moi proclives a levar a cabo estas propostas, pero tamén aclaramos que se renuncian a calquera modificación que poda ser correctora de cuestións gravemente especulativas que ten ese plan, farano público e comunicarán á ciudadanía o que están a facer.

A voceira do Grupo Popular, Sra. Arias Martínez, manifesta que o Sr. Varela fai referencia a ese pleno onde se aprobou de xeito inicial o PXOM, pero que se aprobou co seu voto en contra; agora, sorprendentemente, renuncian a facer modificacións. Desde o Partido Popular sempre mantivemos unha postura coherente, é dicir, temos interese en que o PXOM salia adiante, simplemente estamos esperando ás consideracións por parte da Xunta de Galicia. Sen embargo vostedes, primeiro votan en contra e agora renuncian a facer estas modificacións. ¿Por que ese cambio de postura?

O voceiro do Grupo BNG, Sr. Varela Martínez, contéstalle á Sr. Arias que no 2014 o BNG non tiña representación, polo que nese sentido o BNG non pudo votar a favor nin en contra; con respecto ao Sr. Sardiña, xa se lle contestou; este goberno segue uns criterios técnicos, fixemos as correspondentes consultas co servizo de asistencia a municipios da Deputación, e o que non podemos facer é aprobar unha moción que recolle unhas cousas que non se poden aplicar neste momento; explicouse punto por punto no que este goberno está de acordo nesa moción; nós estaríamos encantados de poder facer esas modificacións pero, como xa dixemos, non se pode neste momento de proceso do plan; explique aos seus votantes que trae unha moción que non se pode realizar; nós temos que ceñirnos a actuacións



CONCELLO DE CABANAS (A CORUÑA)

legais e, como dixemos, se a Xunta di que hai que facer modificacións, ese será o momento de facer ditas modificacións.

O Sr. Alcalde, Ladra Brage, fai un apunte á Sra. Arias Martínez, manifesta que na fase de tramitación no que está o PXOM non temos nada que facer; hai que seguir os cauces legais e acometelos, e xa virán tempos nos que podamos modificar o plan.

A Presidencia somete a votación a proposta formulada polo Sr. Pérez Sardiña, resultando un voto a favor do concelleiro de En Marea (Grupo Mixto) e 10 votos en contra dos membros dos grupos Popular, Socialista, BNG e concelleira de AEC (Grupo Mixto), resultando rexeitada a proposta presentada polo concelleiro D. Xosé Manuel Pérez Sardiña.

4. Moción en relación á carga de traballo presentada polo Comité de Empresa Navantia Fene/Ferrol.

O Sr. Alcalde dá a palabra a Secretaria-Interventora accidental que expón que o cuarto punto da orde do día trata dunha moción presentada polo Comité de Empresa Navantia Fene/Ferrol, en relación á carga de traballo, cunha proposta de moción que inclúe tres puntos. Dita moción foi incluída na Orde do Día na Comisión Informativa de Asuntos do Pleno, de data 13 de setembro de 2019, ditaminando a favor da súa aprobación polo Pleno desta Corporación.

O Sr. Alcalde, Ladra Brage, propón facer da devandita proposta unha declaración institucional, de apoio aos traballadores e ás propostas que expoñen, non existindo oposición por ningunha concelleira nin concelleiro da corporación, dando de seguido a palabra á concelleira do Grupo BNG, Sra. González Grueiro, que procede á lectura da moción presentada polo Comité de Empresa Navantia Fene/Ferrol, como declaración institucional do Concello de Cabanas:

“Os estaleiros da ría de Ferrol (Fene e Ferrol) dedicados á construcción naval militar e civil, Eólica Mariña, Reparacións e Turbinas, xeran ao redor de 2.000 empregos directos, 10.500 de carácter indirectos, o que en si mesmo supón o 22% da contribución do emprego industrial da provincia, achegando o 24% do PIB industrial da provincia da Coruña.

Navantia soubo evolucionar desde unha construcción tradicional ata a utilización das máis modernas tecnoloxías, sendo un referente mundial no deseño, a construcción e reparación de buques militares e civís.

Ademais e o polo de atracción de numerosas empresas auxiliares que desenvolven a súa actividade industrial, complementando os labores principais do estaleiro, colaborando a alcanzar os seus obxectivos de futuro e ofrecendo emprego a gran cantidade de traballadores, emprego cualificado e de calidade, forxouse unha cultura de traballo composta por cualificacións, oficios e saberes de imprescindible conservación e reprodución.

Por outra banda, debido a escasa diversificación da Comarca de Ferrol, Navantia segue xogando un papel primordial a hora de xerar riqueza, emprego e benestar social, do que se benefician todos os sectores: comercial, industrial, servizos, e, en definitiva, toda a economía da zona.

O pasado 20 de decembro asinábase o Plan Estratéxico de Navantia, cuxo máximo obxectivo era sacar a Navantia do pozo en que nos meteron ao longo destes últimos anos, quen a xestione (Navantia estaba en



CONCELLO DE CABANAS (A CORUÑA)

causa de disolución a teor da Lei de Sociedades de Capital), garantirá supervivencia e sustentabilidade da empresa, e con iso o emprego e os dereitos.

Os cimentos do devandito Plan Estratégico son: un Plan Comercial e Carga de Traballo, un Plan de Eficiencia Operativa Estaleiro 4.0 e un programa de rexovenecemento e de formación.

Para a Comarca de Ferrol, cabe destacar, como factores máis significativos, a próxima contratación das 5 fragatas F110, un pedido moi importante, xa que despexará dez anos de carga de traballo.

Por outra banda, o rexovenecemento de persoal a través de contratacóns como fixos de persoal de aproximadamente 675 novos traballador@s, e a xeración dun 5000 empregos entre a Industria Auxiliar e outros inducidos, o cal significa xerar unha gran luz de esperanza, especialmente cara as mozas e mozos, que son os que máis veñen padecendo o paro e a precariedade nesta Comarca.

O contrato das F110 son a garantía de futuro da Empresa, da estabilidade, da carga de traballo e do emprego a medio e longo prazo, senda un elemento imprescindible para servir de soporte aos procesos de dixitalización e Industria 4.0, que xunto á diversificación (naval civil, eólica, etc.,) necesitamos abordar en Navantia.

Coa orde de Execución xa firmada ainda non permite solucionar o baleiro da carga de traballo que irnos sufrir en Navantia e na Comarca de Ferrol no curto prazo (anos 2020/2021), como consecuencia do seu atraso.

Efectivamente, a Orde de Execución tería que producirse no ano 2017 (como prevía a Empresa e a propia Armada Española).

Foi o empeño do anterior Goberno do Estado, por imponer un cambio no tipo de misiles en contra da opinión da Armada, os verdadeiros responsables de que se atrasase durante anos a posta en marcha do contrato para construír cinco fragatas nos estaleiros de Navantia en Ferrol.

Dito retraso acarreou graves problemas a Empresa, pois a planificación que esta realizou baseábanse en que estas construcción enlazasen coa fase final da construcción dos dous Buques de Aprovisionamento de Combate para a Armada Real Australiana, planificación que naturalmente "saltou polo aire" debido a irresponsabilidade daquel Goberno.

A consecuencia e que, nos próximos anos, dende finais deste verán do 2019 ata o 2021, os niveis de paro serán alarmantes e que, no caso de non solucionarse, tería gravísimas repercusións para o emprego, tanto en Navantia, na Industria Auxiliar, e mesmo no concxunto da Comarca de Ferrol.

Si se ten en conta que o desenrollo da enxeñaría que con leva a construcción dun barco (empréganse normalmente en torno a dous anos.), e fácil sacar a conclusión que solo e posible cubrir o vacío que se produce mediante a construcción dun novo proxecto xa desenrolado.

E evidente que si se desea evitar gravísimas repercusións, especialmente no emprego, é imprescindible que se concrete e se adopte a correspondente decisión con carácter de urxencia, única maneira que permite xenerar carga de traballo a partir do ano 2020.



CONCELLO DE CABANAS (A CORUÑA)

Por todo isto, presentase a seguinte:

PROPOSTA DE MOCIÓN

1. Apoio á moción presentada pola Representación Social das traballadoras e traballadores de Navantia Ría de Ferrol.

2. Tendo en conta as coñecidas necesidades da Armada Española, a nosa esixencia pasa por dotar de carga de traballo a Navantia, mediante a contratación dun Buque de Aprovisionamiento en Combate (BAC), dado que contamos coa enxeñería xa desenvolta e isa permitiría cubrir a falta de ocupación dos anos 2020/2021.

3. Dende esta Corporación, instar o Goberno do Estado, Xunta de Galicia e á Dirección de Navantia para que leven a cabo todas as xestións precisas para a concreción destas contratacións no prazo máis breve posiblP. F,m meliúmn tempo, solicitamos aos partidos políticos representados neste Concello o seu apoio e compromiso as propostas contempladas nesta moción”.

5. Moción sobre a declaración de emerxencia climática, presentada pola Asociación Amigos da Terra.

O Sr. Alcalde, Ladra Brage, dá a palabra á concelleira de AEC (Grupo Mixto), Sra. García Amor, que procede á lectura da moción presentada pola Asociación Amigos da Terra, sobre a declaración de emerxencia climática:

“DECLARACIÓN DE EMERXENCIA CLIMÁTICA

A organización Amigos da Terra, con CIF: G32242422, coma integrante da Alianza pola Emerxencia Climática, e na súa representación, Raquel Fernández Rodríguez con DNI 44457087L, e con domicilio a efectos de notificación na rúa Bedoia 5, 2 D, C.P. 32004 Ourense, diríxense ao pleno do Concello de Cabanas e aos grupos políticos para instalos ao recoñecemento do estado de emerxencia climática no que nos atopamos mediante a adopción da presente moción e as medidas que dela se deriven.

O Concello de Cabanas reconoce que o planeta, así como os seres vivos e os ecosistemas, atópanse en grave perigo, proba diso son os recentes informes sobre o estado da biodiversidade do IPBES e sobre o quecemento global de 1,5 °C do IPCC, que alertan dun rumbo que leva á extinción dunha gran parte dos ecosistemas terrestres. Un millón de especies están ameazadas pola actividade humana. Tamén se está ao bordo do punto de non retorno fronte ao cambio climático. Non responder ante a crise ecolóxica e civilizatoria suporía a morte de millóns de persoas, ademais da extinción irreemplazable de especies imprescindibles para a vida na Terra, dadas as complexas interrelacións ecosistémicas.

Nese sentido aceptamos a verdade da crise climática sobre a gravidade da situación. Admitir as evidencias científicas, así como, o camiño de redución das emisións proposto é a única forma de protexer a existencia dun futuro para o municipio. A cidadanía debe de entender a urxencia e irreversibilidade desta loita e o Concello de Cabanas pode desempeñar un papel clave na formación, educación e información sobre o necesario freo ás emisións e realizar unha vital adaptación ás consecuencias do incremento da temperatura global.

Declarar a emerxencia climática require asumir o cumprimento de compromisos políticos reais e vinculantes, moito más ambiciosos que os actuais, coa consecuente asignación de recursos para fazer fronte a esta crise. Unha folla de ruta vinculante capaz de garantir as reducións de gases de efecto invernadoiro anuais necesarias,



CONCELLO DE CABANAS (A CORUÑA)

abandonar os combustibles fósiles, apostar por unha enerxía 100 % renovable e reducir a cero as emisións netas de carbono canto antes, de maneira urxente e prioritaria, en liña coas indicacións do informe do IPCC para limitar o aumento das temperaturas globais a 1,5 °C. Un estado de emergencia implica redirixir todos os recursos disponibles dos Concellos para afrontar a crise climática cos problemas asociados que leva.

A declaración de emergencia climática supón iniciar un proceso de educación, formación e concienciación a toda a poboación sobre a verdade da crise ecolóxica e o enorme cambio necesario frear a emergencia. Ante esta emergencia o Concello comprométese a iniciar este proceso de transformación social e asegurar a plena consecución dos seguintes obxectivos xerais.

Firmado por 44457087L RAQUEL FERNANDEZ (R: G32242422) el día

21/08/2019 con un certificado emitido por AC Representación

O CONCELLO DE CABANAS COMPROMÉTESE A:

1. Establecer os compromisos políticos, normativas e recursos necesarios para garantir reducções de gases de efecto invernadoiro para chegar ao balance neto cero non máis tarde de 2040 e se é posible antes de 2035, así como deter a perda da biodiversidade e restaurar os ecosistemas como única resposta posible para evitar un colapso de todos os sistemas naturais, incluído o humano.

2. Abandonar os combustibles fósiles, apostando por unha enerxía 100 % renovable de maneira urxente e prioritaria. Para iso os gobernos municipais deben analizar como lograr este obxectivo e propor os plans de actuación necesarios, entre outros, frear novas infraestruturas fósiles, alcanzar o pleno autoconsumo eléctrico 100% renovable e unha mobilitade sustentable canto antes, crear espazos peonís, fomentar a bicicleta e outros medios de transporte non contaminantes, reducir a demanda de enerxía até consumos sustentables, promover o aumento da eficiencia enerxética e das instalacións renovables, crear espazos educativos e a información á poboación sobre a emergencia climática, alcanzar unha política de residuo 0, evitar entre os bancos cos que traballa o municipio aqueles que financien proxectos baseados en combustibles fósiles, apoiar a xestión dos montes comunais enfocada á recuperación da terra fértil e o freo da erosión. A recuperación dos acuíferos, a recuperación dos pastos a través da xestión intelixente do territorio, determinar apoios e beneficios fiscais para a repoboación do rural, que desenvolve funcións craves de mitigación do cambio climático e abordar proxectos de rexeneración rural, ecolóxica e humana.

3. É necesario avanzar, entre outras, nunha economía local e de proximidade, que impulse a soberanía alimentaria, sylvicultura, acuicultura, agricultura e gandaría ecolóxica e de proximidade. Alcanzando canto antes a plena subministración agroecolóxica nos servizos de restauración municipais e estendéndoos ao resto da poboación.

4. Iniciar a necesaria adaptación dos municipios á crise climática, coas consecuencias do incremento da temperatura global, as ondas de calor, a irregularidade das precipitacións, o aumento do nivel do mar e outras manifestacións que xa se están manifestando.

5. A xustiza, a democracia e a transparencia deben ser alicerces fundamentais de todas as medidas que se apliquen, polo que é preciso establecer un mecanismo de toma de decisións cidadán de carácter vinculante con competencias en materia de vixilancia, seguimento e control das medidas adoptadas. Para iso será necesario establecer indicadores e obxectivos verificables e cuantificables. Faise necesario garantir que este mecanismo integre especialmente a visión de xénero e doutros colectivos vulnerables.



CONCELLO DE CABANAS (A CORUÑA)

A/ Atención do PLENO DO CONCELLO DE Cabanas

A/ Atención dos Grupos políticos locais con representación no concello

A Alianza pola Emerxencia Climática prepara unha campaña de información e sensibilización sobre a declaración de Emerxencia Climática.

Unha das principais accións que se pretende realizar no marco da campaña que comezamos é a presentación, por parte dos grupos políticos locais con representación nos seus respectivos concellos, dunha moción ao Pleno da Corporación Local, para instalos ao recoñecemento do estado de emergencia climática no que nos atopamos mediante a adopción dunha moción en cada Concello do país e das medidas que dela se deriven.

O obxectivo desta acción é dar visibilidade pública ao posicionamento de boa parte da sociedade e se acepte a realidade da crise climática. As evidencias científicas deben ser recoñecidas de maneira pública, acompañado pola redución das emisións como a única maneira de protexer a existencia dun futuro para os municipios e os seus cidadáns. A ciudadanía debe de entender a urxencia e irreversibilidade desta loita e os concellos deben desempeñar un papel clave na formación, educación e información sobre o necesario freo ás emisións e vital adaptación ás consecuencias do incremento da temperatura global.

Declarar a emergencia climática require asumir o cumprimento de compromisos políticos reais e vinculantes, moito máis ambiciosos que os actuais, coa consecuente asignación de recursos para fazer fronte a esta crise. Por iso os abaixo assinantes esiximos que os Concellos asuman compromisos sobre as medidas que se deben adoptar e que se comprometan a elaborar unha folla de ruta vinculante en liña coas indicacións do informe do IPCC para limitar o aumento das temperaturas globais a 1,5 °C nas mocións de declaración da emergencia climática de cada Concello.

Entendemos que esta cuestión reviste a maior importancia para calquier grupo político, e debense protexer os intereses dos seus veciños e veciñas. Por iso realizamos esta proposta de colaboración, para que presenten, no Pleno do seu concello, unha moción no sentido aludido.

Xuntase a esta comunicación un modelo de moción consensuado polos colectivos da Alianza pola Emerxencia Climática

Axinantes:

2020 Rebelión por el clima, Amigos de la Tierra, Asociación Despierta, Asociación Ecología y Educación para una Ciudad Sostenible – Transitando, ATTAC, BATÍQ, CGT, Climate Reality Project, Confederación Intersindical, Contra el diluvio, Cooperativa Lluriga, Educación Ambiental – EA26, Ecologistas en Acción, Ecooo, Entrepueblos, Extinction Rebellion Spain, Foro transiciones, FRAVM, Fridays For Future, Fundación Vida Sostenible, Greenpeace, IES Las Américas (Parla), InspirAction, Intersindical Región Murciana, Intersindical Valenciana, La Transicionera (Sevilla), Madres por el Clima, Mujeres con Energía, Observatorio de la sostenibilidad, Plataforma por un Nuevo Modelo Energético, Red de Mujeres por una Transición Energética Ecofeminista, Red Ecofeminista, Red ibérica de Ecoaldeas, Revo Prosperidad Sostenible, SEO Birdlife, Sustenta, TEACHERS FOR FUTURE SPAIN / PROFES POR EL FUTURO, Unión Sindical Obrera (USO), València Saludable, WWF España, 350BCN”

O Sr. Alcalde, Ladra Brage, abre unha primeira quenda de intervencións. Na deliberación do asunto prodúcense as intervencións coas opinións que se recollen a continuación:



CONCELLO DE CABANAS (A CORUÑA)

O concelleiro do Grupo Popular, Sr. Fernández Brage, manifesta que para o Partido Popular de Cabanas o medio ambiente e o coidado do planeta sempre serán temas fundamentais, que deberían estar nas primeiras páxinas das axendas políticas das principais institucións; institucións que deberían poñerse de acordo, xa que a destrucción do planeta, neste caso, non entende de cores políticas nin ideoloxías e nos afecta a todos por igual; consideran que a educación e información deben ser primordiais para que a xente sexa consciente da situación e da importancia que teñen as boas prácticas e o coidado do noso planeta, xa non só para nós senón para as xeracións que veñen detrás, que cada vez son máis conscientes da importancia do problema e comezan a esixir aos gobernos que se poñen de acordo e tomen conciencia dunha problemática que cada vez vai a peor. Manifesta que o seu voto será favorable.

O Sr. Alcalde, Ladra Brage, abre unha segunda quenda de intervencións, sen que ningúén faga intervención ao respecto.

De seguido, a Presidencia somete a votación a moción presentada pola Asociación de Amigos da Terra, resultando once votos a favor dos membros do Grupo Popular, Grupo Socialista, Grupo BNG e Grupo Mixto, quedando aprobada por unanimidade a moción sobre a declaración de emergencia climática presentada pola Asociación Amigos da Terra.

6. Ratificación Resolucións da Alcaldía.

O Sr. Alcalde, Ladra Brage, dá a palabra á Secretaria-Interventora accidental, que expón que se inclúen no presente punto Resolucións da Alcaldía, dende o 22 de abril de 2019, na que se procede á convocatoria do último Pleno Ordinario, nas que se establece expresamente dar conta das mesmas ao Pleno da Corporación, sendo as seguintes:

-Resolución 370/2019, de data 6 de maio de 2019. Emenda modificación de créditos 1/19 por incorporación de remanentes, para a corrección de desaxustes observados na contabilidade municipal con motivo de peche do exercicio 2018.

-Resolución 406/2019, de data 20 de maio de 2019. Ratificación obra POS+Adicional 1/2019, en relación á ratificar a conformidade deste Concello coa inclusión no POS+ Adicional 1/2019 da obra “Saneamento de augas residuais en Relousada”, aprobado polo Pleno da Corporación en data 18 de decembro de 2018.

-Resolución 595/2019, de data 8 de xullo de 2019. Atribución de funcións Tesoureira á Técnica de Xestión, por incapacidade laboral temporal do tesoureiro da Corporación e posterior cese do Secretario-Interventor da Corporación, que viña desempeñando ditas funcións.

-Resolución 596/2019, de data 8 de xullo de 2019. En relación ao cese do Secretario-Interventor, D. Antonio López Vila, por xubilación. Na devandita resolución non se establece expresamente o dar conta ao Pleno de forma separada, aínda que se considera axeitada a súa inclusión neste punto pola súa relevancia.

-Resolución 852/2019, de data 13 de setembro de 2019. Delegación das funcións da Alcaldía no Primeiro Tenente de Alcalde para asistencia a Comisión Informativa.



CONCELLO DE CABANAS (A CORUÑA)

Das anteriores resolucións da Alcaldía só e preciso ratificar a Resolución da Alcaldía 406/2019, de data de data 20 de maio de 2019: Ratificación obra POS+ Adicional 1/2019, dando conta ao Pleno das demais relacionadas anteriormente.

O concelleiro de EM (Grupo Mixto), Sr. Pérez Sardiña, manifesta que hai un decreto de atribución de funcións de Tesourería á Técnica de Xestión, o 595/2019, que quería que nos explicara, porque queremos coñecer sobre que informes xurídicos se baseou, e cales son as consecuencias desta asunción por parte da técnica de xestión da área de tesourería; o que vemos no decreto é que se lle atribúen con carácter temporal estas funcións, que nós isto na lei non o coñecemos, se se atribúe con carácter accidental ou ben interino, pero neste caso debería ser un funcionario con habilitación de carácter nacional; que se lle atribúe un complemento polo desempeño das funcións de tesourería, así como dar conta aos bancos e ao Pleno.

O Pleno, segundo a normativa, debería estar informado disto con anterioridade, porque o Presidente da Corporación, como xefe superior de persoal, acreditará a imposibilidade de cubrir o posto cun funcionario de administración local con habilitación de carácter nacional, poñendo tal circunstancia en coñecemento do Pleno mediante informe remitido ao mesmo, e posteriormente solicitará a asistencia da Deputación Provincial e, no seu defecto, como última posibilidade, poderíase nomear a un funcionario propio; nós non temos constancia de ningunha destes trámites e gustaríanos que se nos aclarase.

O Sr. Alcalde, Ladra Brage, dá a palabra á Secretaria-Interventora accidental, que manifesta que as funcións de Tesourería estaban asumidas por D. José Manuel Montero, que estaba en situación de baixa por incapazade laboral temporal desde o un de agosto de dous mil dezaoito; que con motivo da baixa de dito funcionario as funcións de tesourería foron asumidas polo Secretario-Interventor, D. Antonio López Vila, que as estivo desempeñado ata a data do seu cese, en data 8 de xullo de 2019; como na corporación no había outra persoa que puidese asumir dita función, por esa resolución de alcaldía, asignáronse á miña persoa ditas atribucións.

A continuación a Presidencia somete a votación a ratificación e conformidade deste Concello coa inclusión no POS+ Adicional 1/2019 da obra “Saneamento de augas residuais en Relousada”, aprobado polo Pleno da Corporación en data 18 de decembro de 2018, resultando once votos a favor dos membros do Grupo Popular, Grupo Socialista, Grupo BNG e Grupo Mixto, quedando aprobada por unanimidade a ratificación da inclusión de dita obra no POS+ Adicional 1/2019.

7. Informes da Presidencia.

7.a) Resolucións da Alcaldía.

O Sr. Alcalde, Ladra Brage, dá a palabra á Secretaria-Interventora accidental, que expón que neste punto dáse conta das Resolucións da Alcaldía ditadas dende a última convocatoria de Pleno Ordinario, dende a 353/2019, de data 22 de abril de 2019: Convocatoria sesión Pleno



CONCELLO DE CABANAS (A CORUÑA)

ordinario ata a 887/2019, de data 20 de setembro de 2019: Convocatoria sesión Pleno ordinario.

Antes da pasar ao punto de rogos e preguntas o concelleiro de EM (Grupo Mixto), Sr. Pérez Sardiña, manifesta que quere introducir mociones.

O Sr. Alcalde, Ladra Brage, pregunta si son pola vía de urxencia.

O concelleiro de EM (Grupo Mixto), Sr. Pérez Sardiña, manifesta que é o que corresponde.

O Sr. Alcalde, Ladra Brage, pregunta que moción ten de urxencia.

O concelleiro de EM (Grupo Mixto), Sr. Pérez Sardiña, manifesta que teñen dúas mociones de urxencia. A primeira está presentada en xullo de 2019, rexistrada, pola transparencia e o dereito á defensa nos procesos selectivos de persoal municipal; esta moción foi rexistrada por non foi incluída na orde do día, nin na do pleno que lle correspondía, que era a de xullo, nin en este pleno de setembro, sen ningún tipo de explicación; manifesta que, en todo caso, deberían acompañar ao expediente do pleno, non o fai, e ademais entendemos que é unha proposta que si se debería ter incluído porque entendemos que o que se fai é un pronunciamento político, e nese pronunciamento político se insta ao alcalde a respectar unha serie de cuestións de dereitos fundamentais, aparte de garantir o dereito constitucional á defensa por parte da persoa que se viu afectada e que reclamou no posto de limpadora do centro de saúde-

Nesta liña entendemos que si é urxente, porque evidentemente das resolucións que estamos falando xa pasaron dous meses e medio e, entendemos que a corporación se debe de pronunciar sobre este asunto, que non se vai poder debater ata o mes de novembro ou nunca, como xa podemos ver, que non queren incluíla na orde do día do pleno.

O Sr. Alcalde, Ladra Brage, manifesta que votarán a urxencia, pero quere dicir que esta moción, como xa se explicou na Comisión, non da lugar a levala a pleno, por unhas condicións xurídicas. Pediuse un informe a Secretaría-Intervención onde se informa de que non é posible levar esta moción ao Pleno porque se lle está pedindo unhas atribucións ao Pleno e ao Alcalde que son ilegais.

Quen fixo a reclamación, que ten todo o dereito do mundo a facela, fixo unha reclamación ao alcalde, foi tramitada e denegada porque non se encontrou ningunha irregularidade no proceso. Se hai algunha dúbida no proceso teñen que ir ao contencioso-administrativo, non hai máis recorrido. O Pleno e o Alcalde non teñen potestade para facer o que se lle pide nesa moción; manifesta que van proceder s a votar a urxencia da moción.

O concelleiro de EM (Grupo Mixto), Sr. Pérez Sardiña, manifesta que non se pode facer control xurídico sobre un pronunciamento político, porque neste acordo se di claramente instar a que o alcalde de Cabanas anule, instar a; o Pleno non está invadindo as competencias do Alcalde; o Pleno está exercendo os seus dereitos de control e fiscalización dos órganos de goberno, que o fai a través deste concelleiro que lles esixe que adopten unha serie de medidas porque entendemos que se viu vulnerado o dereito constitucional á defensa da persoa que reclamou. É un pronunciamento político. Manifesta que se poñen a venda antes da ferida



CONCELLO DE CABANAS (A CORUÑA)

nos dan a entender outra serie de cuestiós. Entendemos perfectamente o que están facendo; pídense un informe xurídico para bloquear unha moción, pero non se pide para un nomeamento accidental dunha tesoureira, o que me parece de gravidade extrema.

Sometida a votación a moción de urxencia presentada por EM-PDDdG, con cinco votos a favor dos representantes do Grupo Popular e o concelleiro de EM-PDDdG (Grupo Mixto), e seis votos en contra dos representantes do Grupo Socialista, Grupo BNG e a concelleira de AEC (Grupo Mixto), queda rexeitada a urxencia.

En segundo lugar o concelleiro de EM, Sr. Perez Sardiña presenta a segunda moción pola vía de urxencia, en relación á creación dunha ordenanza reguladora de subvencións para compra de libros e material escolar. Propone que a tramitación e entrada en vigor sexa no presente ano 2019, polo que os prazos, se se debate con posterioridade no pleno de novembro, non permitiría cubrir os gastos do presente ano ás posibles persoas beneficiarias.

O Sr. Alcalde, Ladra Brage, manifesta que debería ter presentado dita moción con anterioridade, xa que existen mecanismos para facelo, e non traelo a última hora. É interesante, si, pero creo que temos tempo para traballala estes dous meses ata o próximo pleno de novembro e levala a cabo; non imos a debater sobre unha moción da que non temos información algúns. Manifesta que é máis interesante deixala para o mes de novembro, e tramitala nese mes.

O concelleiro de EM (Grupo Mixto) Sr. Perez Sardiña, manifesta que a información que debe conter a moción é simplemente tramitar no 2019 o expediente de creación da ordenanza non fiscal reguladora de subvención por compra de libros e material escolar; sobre a presentación de mocións manifesta que hai que presentalas con quince días de antelación, pero agora encóntrase con que as mocións tamén se poden presentar pola vía de urxencia no mesmo pleno, unha vía lexítima e posible, e nós imos exercer ese dereito.

Sometida pola Presidencia a urxencia da moción, con cinco votos a favor dos membros do Grupo Popular e concelleiro de EM (Grupo Mixto), ningún voto en contra e seis abstencións dos Grupos Socialista, BNG e concelleira de AEC (Grupo Mixto), queda aprobada a urxencia da moción.

O concelleiro de EM, (Grupo Mixto) Sr. Perez Sardiña, manifesta que a moción trata sobre a creación dunha ordenanza para colaborar nos gastos ocasionados con motivo do inicio do curso escolar, pola adquisición de libros e material escolar das familias da localidade en situación de dificultade económica, que teñan fillas ou fillos cursando estudos, mediante a concesión dunha axuda familiar para estes efectos; propoñemos crear esta nova ordenanza para regular esta materia e aplicar o marco legal vixente, e desenvolvela de forma específica.

Por todo isto o Pleno acorda abrir e tramitar ata a súa aprobación en 2019 o expediente de creación da ordenanza non fiscal reguladora de subvencións por compra de libros e material escolar; esta sería a exposición e o acordo.

O Sr. Alcalde, Ladra Brage, abre unha quenda de intervencións. Na deliberación do asunto prodúcense as intervencións coas opinións que se recollen a continuación:



CONCELLO DE CABANAS (A CORUÑA)

A concelleira do Grupo Socialista, Sra. Rodríguez Fernández, manifesta que levan preto dun mes traballando nesta modificación, que xa existe unha axuda a material, pero a queren incrementar; subscribe que deben axustarse aos orzamentos aprobados para este ano e cando estea lista levarase ao Pleno.

A voceira do Grupo Popular, Sra. Arias Martínez, comenta que desde o Partido Popular de Cabanas lles parece fundamental a axuda ás familias menos favorecidas, e que de todos os axustes que se deben levar a cabo nos orzamentos do concello isto debe ter prioridade, moi por riba doutras cuestións; as familias precisan axuda urxente e isto debe ser unha das primeiras cousas das que se discuta; levan cen días de goberno e o curso escolar está comezado, entón ¿para cando?

A concelleira do Grupo Socialista, Sra. Rodríguez Fernández, expón que o curso está comezado, e esta axuda xa existe, non tendo ningunha solicitude a maiores, non existindo ningún neno que estea descuberto; manifesta que para o curso que ven van a ampliar o orzamento para dar máis axudas ás familias.

O concelleiro de EM, (Grupo Mixto) Sr. Pérez Sardiña, di que pode entender que estean utilizando a vía da ordenanza de emerxencia social, pero esta vai máis alá, referíndose a casos que non estean únicamente incluídos nesta necesidade; considera que é unha vía que hai que ampliar e de que a partires duns determinados niveis de renda se concedan axudas de ata un 20% ou 50% no material e dos libros. Nesta ordenanza non se está establecendo nada en relación ao tema orzamentario, senón ao tema normativo, que queremos regular, e que todo o mundo poda concorrer publicamente e que se saibam os criterios de adxudicación.

A voceira do Grupo Popular, Sra. Arias Martínez, quere recalcar que non é verdade que estean todos os nenos cubertos neste curso escolar.

O Sr. Alcalde, Ladra Brage, apunta á Sra. Arias Martínez que tiveron doce anos para facelo, en non o fixeron, así que non pidan agora que en cen días se fagan milagres.

Sometida a votación a moción presentada polo concelleiro, Sr. Pérez Sardiña, con cinco votos a favor dos membros do Grupo Popular e concelleiro de EM (Grupo Mixto), ningún voto en contra e seis abstencións dos membros do Grupo Socialista, Grupo BNG e concelleira de AEC (Grupo Mixto) resulta aprobada a moción presentada.

8. Rogos e preguntas.

A voceira do Grupo Popular, Sra. Arias Martínez, comeza coas preguntas orais:

Pregunta sobre as visitas realizas á Xunta de Galicia que levan efectuadas nos primeiros cen días de goberno; que obras novas teñen licitadas que non estivesen xa licitadas por eles, así como que obras teñen en camiño.

O Sr. Alcalde, Ladra Brage, contesta que de momento visitas á Xunta non fixeron ningunha, si tiveron unha reunión coa demarcación de estradas para falar de infraestruturas, así como bastantes reunións coa Deputación Provincial; estamos traballando para levar a cabo os proxectos do ano que ven, tanto do POS como doutras obras.



CONCELLO DE CABANAS (A CORUÑA)

O voceiro do grupo BNG, Sr. Varela Martínez, manifesta que si foron a Medio Rural.

A voceira do Grupo Popular, Sra. Arias Martínez, expón que saben que houbo unha reunión polo tema do PXOM; queremos saber que novedades hai nel; así mesmo, as semana pasada houbo unha reunión técnica para a senda de Cardeita e igrexa de San Martiño, polo que queremos saber en que punto se encontra.

O voceiro do grupo BNG, Sr. Varela Martínez, manifesta que sobre o PXOM xa se informou, simplemente foi unha reunión de seguimento co redactor do plan xeral.

O Sr. Alcalde, Ladra Brage, manifesta que sobre a reunión mantida coa demarcación de estradas, querían saber a intención que tiña este goberno en seguir co proxecto de mellora na zona de Cardeita e dixemos que si; nos parece un bo proxecto e estamos recollendo documentación para facilitarles.

A voceira do Grupo Popular, Sra. Arias Martínez, pregunta con respecto ao PAI, que teñen entendido que hai problemas, chegan moitas queixas da xestión pola empresa; queremos saber se o goberno vai adoptar algunha medida, e se é así cal é esa medida, xa que este PAI sempre funcionou de xeito exemplar; pregunta ademais, quen solicitou o cambio de horario e se foi notificado a todos os usuarios. A xente quéixase do cambio de horario e de que non se sabía ata o último momento quen ía dar clase ao seu fillo.

A concelleira do Grupo Socialista, Sra. Rodríguez Fernández, expón que non é de todo certo que o PAI leve moitos anos traballando ben, tanto a anterior empresa como esta tiveron bastantes críticas; como ben saben hai un contrato de tres anos, cunha prórroga dun ano a maiores. Temos queixas de profesores e de familias, pero os contratos non se poden romper simplemente por queixas pequenas, orais; non hai nada escrito e nada que nos de poder para poder romper o contrato con esa empresa; estamos traballando para poder revisar totalmente o contrato e cando apareza unha pequena cousa que nos de o poder de poder romper ese contrato ímolo facer, porque nos somos os primeiros que non estamos contentos con esa empresa, porque os nenos non están ben coidados.

A voceira do Grupo Popular, Sra. Arias Martínez, incide en si se notificou a todos os usuarios o cambio de horario ou se encontraron os pais con nenos que non podían ser atendidos a primeira hora da mañá.

A concelleira do Grupo Socialista, Sra. Rodríguez Fernández, responde que se notificou a todos os pais o último venres do mes de agosto; houbo unha reunión do PAI, onde foron as familias, e as profesoras comunicaron o cambio de horario. O cambio horario foi tomado en consideración por solicitudes de moitas familias que lles viña mellor para a súa conciliación, sendo comunicado a todas as familias nesa xuntanza. As familias que non acudiron á xuntanza, seguramente non foron informadas porque non estaban alí.

A voceira do Grupo Popular, Sra. Arias Martínez, comeza coas preguntas escritas:

- I. Desde o ano 2015 o Concello de Cabanas organizaba a Ruta Cicloturista en colaboración coas sociedades veciñas de San Mamede de Laraxe e AVV Santa Cruz do Salto con moi bons resultados de participación, e ademais o recaudado era destiñado a fins benéficos, xa que o



CONCELLO DE CABANAS (A CORUÑA)

pagamento da inscrición eran 2 kg de alimentos non perecedeiros. Por que este ano non se levou a cabo? Tense pensado retomar nun futuro?

O Sr. Alcalde, Ladra Brage, manifesta que cando souberon que se organizaba esta actividade desde o concello era demasiado tarde para organizala; a intención que temos é de retomala e seguir traballando tamén noutras actividades sociais para recadar medios e alimentos.

2. Existen queixas por parte da veciñanza do Batán conforme a recollida do lixo non se fai coa asiduidade coa que viña a facerse. Ten isto algunha explicación por parte do goberno?

A concelleira e AEC (Grupo Mixto) manifesta que está sorprendida, xa que ela reside ademais nesa zona; non constan queixas no Concello no rexistro nin no teléfono do veciño; preguntei aos veciños que viven cerca, non observando cos que eu falei nada anormal; púxenme en contacto coa empresa e manifestaron que seguían cos mesmos días de recollida, martes e xoves; manifesta que vai a seguir observando, e se ve que se acumula verán a opción de ampliar a recollida ou poñer un contedor a maiores, para que non quede o lixo na rúa.

3. Desde fai varios meses o camiño da Preguiza na parroquia de Cabanas atópase sen vallar e sen sinalización. Ten o Concello programada algunha actuación na zona vista a súa perigosidade para o tránsito da veciñanza?

A concelleira do Grupo Socialista, Sra. Rodríguez Ferreiro, contesta que nese camiño hai unha valla e non podemos estar vixiando alí para que non pase a xente; de todas formas, estamos traballando en varias opcións para darlle solución ese camiño.

4. Que nos poden dicir desde o Concello da traída nova (Pedra do Couto) que daría servizo ao Polígono de Vilar do Colo e parroquias colindantes?

O voceiro do Grupo BNG, Sr. Varela Martínez, manifesta que en 2007 foi elixido alcalde o Sr. Germán Castrillón, sendo alcalde do Partido Popular ata este ano; a obra foi recepcionada polo Sr. Castrillón o 29 de setembro de 2011; entón entende, que desde o Partido Popular, serán capaces de ofrecer unha resposta de porque non foron capaces de poñela en marcha en oito anos; desde o Concello comezamos a examinar o expediente para ver como pode poñerse en marcha esta cuestión e imos contactar coa Dirección Xeral da Xunta de Galicia a este respecto.

5. A Asociación de San Mamede de Laraxe solicitou fai uns meses a este Concello a doazón da madeira que se retirou da praia da Madalena, e a contestación por parte do alcalde foi que "o tiña que consultar". Vendo que parte da madeira segue no mesmo lugar. ¿Consultou xa o asunto? ¿Ten pensado doar a esta Asociación a madeira?

O Sr. Alcalde, Ladra Brage, contesta que a pouca madeira que hai repartirse ás diferentes asociacións que lles faga falta.

A voceira do Grupo Popular, Sra. Arias Martínez, presente como suxestións:

l. A estas alturas do ano vemos que áinda hai moitas zonas do Concello que se atopan sen desbrozar, o que se traduce nunha gran cantidade de queixas por parte dos veciños. Entendemos que haxa un pequeno retraso no asunto pero consideramos que xa non é



CONCELLO DE CABANAS (A CORUÑA)

normal, contando ademais cun novo condutor de tractor, o que da a entender que se trata dunha importante falta de organización por parte do Concello, polo que rogamos que leven a cabo dunha forma máis planificada o desbroce, que está a causar un gran malestar nas parroquias.

A concelleira de AEC (Grupo Mixto) Sra. García Amor, manifesta que a ela non lle chegaron queixas deste tipo; cos medios que temos é fácil que nesta época nos atopemos nesta situación; os camiños están praticamente todos, exceptuando os camiños que están pendentes da subvención do plan contra incendios da Xunta, que se vai contratar estes días. O noso condutor segue sendo o mesmo que estaba antes.

2. Relacionado co rogo anterior, hai unhas semanas anunciaron na prensa que o Concello de Cabanas optaba a un premio internacional ao lugar máis acolledor do mundo para a infancia e adolescencia en Child Friendly Cities Inspire (CFCI), polo que rogamos que antes de presumir de todo isto, o cal reconecemos que é unha boa noticia, manteñan limpos os parques infantís do Concello, os cales se atopan nun estado lamentable.

A concelleira do Grupo BNG, Sra. González Grueiro, responde que o premio ao que optamos como cidade amiga da Infancia é un proxecto dependente de UNICEF, que ten uns obxectivos concretos e específicos, que pode comprobar porque están publicados, ou se lle pode informar aquí no Concello, que nada teñen que ver con infraestruturas nin con mantemento de parques infantís; unha cidade amiga de infancia non é unha cuestión de infraestruturas, é unha cuestión de diversificación e educacional; o premio ao que optamos é pola campaña que fixemos de “Cabanas diversa”, un obxectivo moi concreto e que promove UNICEF. Reitera que en ningún caso ten que ver con infraestruturas, senón con respecto á diversidade, á liberdade e ao dereito a decidir.

Manifesta que a día de hoxe non temos coñecemento de que ningún parque se atope en mal estado ou de que non se atope limpo; se algún está nesa situación, dígao e tomaremos as medidas oportunas.

A voceira do Grupo Popular, Sra. Arias Martínez, apunta que con independencia de que o premio teña que ver coa educación, o concello debe contar con infraestruturas que o fagan acolledor para os nenos.

3. Por respecto a aqueles concelleiros que non teñen unha dedicación exclusiva ou parcial neste Concello, rogamos que teñan a ben avisar da convocatoria dos plenos extraordinarios con maior antelación para poder organizar o noso traballo ou estudos.

A concelleira do Grupo Socialista, Sra. Rodríguez Fernández, responde que o Pleno foi convocado en tempo e forma, coa entrega de toda a documentación na mesma convocatoria, algo que non estaba a suceder anos atrás; manifesta ademais que o pleno extraordinario se convocou coa antelación que se puido, dentro dos marxes legais.

O Sr. Alcalde, Ladra Brage, dá a palabra ao concelleiro de EM (Grupo Mixto), Sr. Pérez Sardiña, que comeza coas preguntas presentadas por escrito:



CONCELLO DE CABANAS (A CORUÑA)

1. Na presente lexislatura cales son as liñas de traballo que desenvolverá o responsable das árees de Facenda, Sanidade, Seguridade cidadá, Mocidade, Contratacóns e Deporte? Que expectativas de desenvolvemento, crecemento e innovación pretende acadar a final de lexislatura?

O Sr. Alcalde, Ladra Brage, responde que todos se presentaron cun programa electoral, que intentarán levar a cabo o máximo posible; manifesta que o importante agora é cadrar as contas, facer que os orzamentos do ano que ven sexan xustos e reais para as necesidades deste concello, e traballar para facer unha maior inversión no ámbito social.

2. Na presente lexislatura cales son as liñas de traballo que desenvolverá o responsable das árees de Promoción Económica e Turismo (emprego, transporte, polígono industrial, telecomunicacións, comercio, feiras e patrimonio), Urbanismo, Medio Ambiente, participación veciñal, Comunicación e Innovación tecnolóxica? Que expectativas de desenvolvemento, crecemento e innovación pretende acadar a final de lexislatura?

O voceiro do Grupo BNG, Sr. Varela Martínez, responde que as liñas de traballo que vai desenvolver son o cumprimento do programa electoral co que se presentou ás eleccións e, en razón do cal, vai ser avaliado polo pobo que prestou o seu voto nas eleccións de maio. O noso grande obxectivo será facer do concello un axente de activación da economía do concello e traballar nas diferentes árees que temos asignadas para melloras as condicións de vida de toda a veciñanza.

3. Na presente lexislatura cales son as liñas de traballo que desenvolverá a responsable das árees de infraestruturas, seguridade viaria, mantemento e parques infantís, mobilidade e accesibilidade? Que expectativas de desenvolvemento, crecemento e innovación pretende acadar a final de lexislatura?

A concelleira do Grupo Socialista, Sra. Rodríguez Ferreiro, responde que traballarán para darlle cumprimento ao programa electoral e atenderán todas as necesidades veciñais.

4. Na presente lexislatura cales son as liñas de traballo que desenvolverá a responsable das árees de persoal, réxime interno e formación, muller, igualdade, LGTBI, e normalización lingüística? Que expectativas de desenvolvemento, crecemento e innovación pretende acadar a final de lexislatura?

A concelleira do Grupo BNG, Sra. González Grueiro, manifesta que a liña de traballo será cumplir o programa electoral co que se presentaron ás eleccións, que será avaliada polos votantes e, máis concretamente, desenvolver políticas reais para conseguir a igualdade, dar visibilidade á diversidade, fomento da nosa lingua e mellora das condicións das nosas traballadoras e traballadores.

5. Na presente lexislatura cales son as liñas de traballo que desenvolverá a responsable das árees de Servizos Sociais, Educación, Cultura, Asociacionismo e Festexos? Que expectativas de desenvolvemento, crecemento e innovación pretende acadar a final de lexislatura?

A concelleira do Grupo Socialista, Sra. Rodríguez Fernández, manifesta que a súa liña de traballo será o cumprimento do programa electoral co que nos presentamos ás eleccións, e



CONCELLO DE CABANAS (A CORUÑA)

traballar nas diferentes árees para mellorar as condicións de vida de toda a veciñanza de Cabanas, así como fomentar e dignificar a nosa cultura tradicional e colaborar estreitamente coas asociacións e entidades culturais do noso concello.

6. Na presente lexislatura cales son as liñas de traballo que desenvolverá a responsable das árees de Servizos (augas, saneamento, residuos, limpezas, desbroces e alumado), Sustentabilidade e Medio Rural? Que expectativas de desenvolvemento, crecemento e innovación pretende acadar a final de lexislatura?

A concelleira de AEC (Grupo Mixto), Sra. García Amor, responde que é unha pregunta tan xenérica que a súa resposta non pode ser demasiado concreta; mentres no remate o ano, estase a cumplir cos obxectivos fixados para este ano, facendo os estudos pertinentes para economizar e reducir gastos enerxéticos, optimización de recursos, así como estudar e analizar as deficiencias observadas anos antes para mellorar cara o ano que ven; unha vez estudiado o orzamento para o ano próximo seguiremos traballando, ata onde nos permita a economía municipal, ampliando os servizos á veciñanza.

De seguido, o concelleiro de EM (Grupo Mixto), Sr. Pérez Sardiña, comeza coas preguntas orais:

¿Cal é o programa electoral? ¿Cada un do seu partido? ¿Hai un programa electoral refundido?, porque todos se refiren ao programa electoral, pero lle gustaría saber onde está ese programa electoral.

O Sr. Alcalde, Ladra Brage, responde que se trata dos programas electorais de cada un dos partidos.

Como segunda pregunta oral, o concelleiro de EM (Grupo Mixto), Sr. Pérez Sardiña, sobre a xestión do San Xoán, ¿cal foi o operativo de limpeza? E ¿cal foi o destino da area extraída da praia da Madalena?

A concelleira de AEC (Grupo Mixto), Sra. García Amor, responde que se contratou a unha empresa externa.

O concelleiro de EM (Grupo Mixto), Sr. Pérez Sardiña, tamén sobre a xestión do San Xoán, pregunta cantas fianzas en total foron devoltas e cantas quedaron pendentes de devolución.

O Sr. Alcalde, Ladra Brage, responde que áinda estamos finalizando o proceso, xa que non todo o mundo solicitou a devolución. Manifesta que agora mesmo non ten o dato concreto.

O concelleiro de EM (Grupo Mixto), Sr. Pérez Sardiña, sobre a xestión do accidente no paseo e declaración de loito oficial, queren preguntar , porque non teñen o informe oficial, a que causa se debeu a morte dunha señora no paseo da Madalena,

O Sr. Alcalde, Ladra Brage, responde que cree que todo o mundo o sabe e que non é unha pregunta para facer aquí desta maneira; foi un accidente fortuíto, onde rompeu a pola dun piñeiro, e de momento non hai máis datos da investigación policial que se está levando a cabo; cando se teña o informe da policía se fará público como ten que ser.



CONCELLO DE CABANAS (A CORUÑA)

O concelleiro de EM (Grupo Mixto), Sr. Pérez Sardiña, manifesta que ten que preguntar no pleno porque non tiveron outra oportunidade, nin tiveron unha chamada por parte da alcaldía nese sentido.

O concelleiro de EM (Grupo Mixto), Sr. Pérez Sardiña, como cuarta pregunta oral, relacionada con este asunto, pregunta que motivou a omisión de información aos concelleiros do pleno en relación a este asunto.

O Sr. Alcalde, Ladra Brage, pregunta a que tipo de omisión de información se refire; manifesta que se fixo unha concentración ao día seguinte e puido preguntar o que quixera porque as portas están abertas; subscribe que non ten obriga de chamalo persoalmente para comunicarollo.

O voceiro do Grupo BNG, Sr. Varela Martínez, responde ao Sr. Pérez Sardiña que non entende que pretende con isto, porque o día do accidente foron varios dos concelleiros deste goberno, que estiveron durante horas onde foi o accidente, e vostede non se dirixiu a ningúen do goberno para preguntar que pasara; entende que esa pregunta sobra.

O concelleiro de EM (Grupo Mixto), Sr. Pérez Sardiña, pregunta que motivou a non convocatoria de pleno para declarar loito oficial.

O Sr. Alcalde, Ladra Brage, manifesta que o goberno ten a potestade de declarar loito oficial.

O concelleiro de EM (Grupo Mixto), Sr. Pérez Sardiña, manifesta que o goberno non ten esa potestade por si propio; hai unha ordenanza de honras e distincións que establece no seu artigo 14 que o loito oficial será declarado prioritariamente polo pleno da corporación.

Manifesta que si tiñan a obriga de chamarlos e pregunta que motivou a omisión da consulta aos portavoces para declarar loito oficial a través de decreto, porque tiveron coñecemento polo facebook do concello, e dez minutos despois chegoulles un correo electrónico; continúa dicindo que esa foi toda a comunicación que tiveron con eles, e quere que llo expliquen.

O Sr. Alcalde, Ladra Brage, responde que se lles comunicou o loito e publicouse.

O concelleiro de EM (Grupo Mixto), Sr. Pérez Sardiña, manifesta que hai outra cuestión que indignou ao veciños de Cabanas sobre este asunto, sendo que despois do minuto de silencio, parece ser que o Alcalde se foi de Cabanas. Pregunta o Sr. Pérez Sardiña, desde que día a que día se ausentou o Sr. Alcalde do termo municipal e por que a alcaldía non realizou delegación de competencias pola ausencia do termo municipal.

O Sr. Alcalde, Ladra Brage, responde que foi unha viaxe por urxencia, un sábado, e non se puido facer a delegación.

O concelleiro de EM (Grupo Mixto), Sr. Pérez Sardiña, pregunta que concelleiros gozaron de vacacións desde que se aprobaron as dedicacións do goberno local.

O Sr. Alcalde, Ladra Brage, solicita que lle repita a pregunta, procedendo o Sr. Pérez Sardiña a repetir a cuestión.

O Sr. Alcalde, Ladra Brage, responde que ningún.



CONCELLO DE CABANAS (A CORUÑA)

O concelleiro de EM (Grupo Mixto), Sr. Pérez Sardiña, pregunta, en relación ao Camiño Inglés, ¿que xestións realizou o goberno local para cumplir a moción aprobada na pasada lexislatura en relación aos trazados?

O voceiro do Grupo BNG, Sr. Varela Martínez, responde que está pendente de asumir ese tema.

O concelleiro de EM (Grupo Mixto), Sr. Pérez Sardiña, pregunta que cales son as previsións do goberno en canto ao establecemento de zonas para aparcamento de residentes e prazas de aparcamento para persoas con discapacidade funcional na zona do Areal.

A concelleira do Grupo Socialista, Sra. Rodríguez Ferreiro, responde que está solicitada autorización de estradas para pintar unhas prazas para persoas con mobilidade reducida e, en canto á zona de residentes, se está estudiando.

O concelleiro de EM (Grupo Mixto), Sr. Pérez Sardiña, pregunta cantas sesións se celebraron da Xunta de Delegados desde que comezou a lexislatura.

O Sr. Alcalde, Ladra Brage, responde que todos os luns ás dez.

O concelleiro de EM (Grupo Mixto), Sr. Pérez Sardiña, manifesta que teñen múltiples queixas en canto ás rozas e situación de beirarrúas, así como solicitude de veciños por rexistro que están sen atender. Por iso, pregunta cales son as previsións para a realización das rozas e que foi o que dificultou que se realizasen ditos traballos, manifestando así mesmo, as queixas de veciños en relación á falta de roza na zona do casa do Concello.

A concelleira de AEC, Sra. García Amor, responde que non lle consta ningún rexistro nin ningunha queixa; manifesta que os únicos camiños que están pendentes de rozar son os da subvención do plan contra incendios da Xunta de Galicia; manifesta que agora mesmo están no polígono, que considera moi necesario, e que se deixou sen rozar a zona do concello para atender os camiños veciñais.

O concelleiro de EM (Grupo Mixto), Sr. Pérez Sardiña, pregunta en relación ás rozas e lumes, que medidas adoptou o concello para previr a afección a vivendas en caso de lume forestal.

A concelleira de AEC, Sra. García Amor, responde que lle acaba de contestar.

O concelleiro de EM (Grupo Mixto), Sr. Pérez Sardiña, pregunta sobre o estado dos camiños, que iniciativas van adoptar para paliar o deterioro do firme en múltiples viais municipais.

A concelleira do Grupo Socialista, Sra. Rodríguez Ferreiro, responde que en canto teñan dispoñibilidade orzamentaria para facelo o farán, do primeiro ao último.

O concelleiro de EM (Grupo Mixto), Sr. Pérez Sardiña, presenta como suxestión, que chegou unha queixa sobre o estado do semáforo do Areal, estando apagado, polo suxire que o arranxen á maior brevidade posible, porque a situación de inseguridade é evidente.

A concelleira de AEC, Sra. García Amor, responde que están avisados, que se revisou o mesmo día que se apagou, e que está pendente dunha placa que ten que vir dun provedor; que tardará un día ou dous.



CONCELLO DE CABANAS (A CORUÑA)

O concelleiro de EM (Grupo Mixto), Sr. Pérez Sardiña, como segunda suxestión, manifesta que unha veciña reclamou máis papeleiras para a zona do Areal por escrito, polo que suixerímos que doten de maior número de papeleiras e se realice unha limpeza máis a fondo desas zonas.

O concelleiro de EM (Grupo Mixto), Sr. Pérez Sardiña, como terceira suxestión, manifesta que lles chegou unha queixa veciñal sobre os tornillos que quedaron moi descubertos, con perigo para os nenos que están xogando, na zona de canastas do parque do Areal.

A concelleira do Grupo Socialista, Sra. Rodríguez Ferreiro, responde que eses tornillos están cortados fai un mes.

O concelleiro de EM (Grupo Mixto), Sr. Pérez Sardiña, como cuarta suxestión, manifesta que hai unha cuestión en relación a unha farola en Barcia; que avisaron e que foron por alí e non a localizaron; polo que lles indica que segue sen resolver este problema.

O concelleiro de EM (Grupo Mixto), Sr. Pérez Sardiña, como quinta suxestión, manifesta que en relación ao servizo de socorrismo, solicitan que aparte dos avisos que fan en lingua castelá tamén se realicen en lingua galega.

A continuación a Presidencia levanta a sesión, sendo as 21:00 horas, da cal estendo a presente acta, a cal se une como Anexo a gravación sonora, e do que eu como Secretaria accidental, dou fe.

Vtº e prace.
O Alcalde

A Secretaria accidental

